

Die Verdächtige

Musical score for 'Die Verdächtige' in G major and 2/4 time. The score consists of six staves of music. Chords are indicated below the notes: D, A7, D, G, D, A7, D, D, A, D7, G, D, A, D.

“Eh jemersch, itz, wo der’s so sägit, da düecht’s mi,
das mues fasch dä jung Schnuifer sy näbedra,
dä isch doch au Nächt ersch am haubi eis heicho
u het son e ghüslete Tschäppu agha,
de het er so längechi Druckli im Outo,
Fotone vo Frouen u Glesli, u pfyft
gäng da das fufüfü fufüfü fufüf
u de die Buecher wo dä aube — wüsst der,
i wett ja nüt gseit ha schüschüschüschü
schüschüschüschüschüschüschüschü
gäuet das düecht öich ou?
dä chönnti’s sy, momou!

Dir aber, itz losit, werum mues’s e Ma sy?
Da git’s son es Fröilein, das heisst Annerös,
u wie no meh, item, die het a mym Büüssi
einisch e Schutt ggä, sider isch’s so närvös,

de tret si e Briue, da cha si zwar nüt derfür,
aber itz losit, die het schon es Bis,
u de de de lat si gäng ds Wasser la loufe
u lachet so hehehehe wie ne Giiss,
i wett zwar nüt gseit ha schüschüschüschü
schüschüschüschüschüschüschüschüschü
gäuet das düecht öich ou?
Die chönnti’s sy, momou!

De het’s aber hie no e so paar Usländer
u bsungerbar eine, dä chunnt so derhär,
wi wenn är wett säge: au Schwyzer sy Möffe
u wi wenn är hie scho dr Husmeichter wär,
derby chan er chuum richtig rede wi mir tüe,
u stagget u schwauderet, es isch e Gruus,
vetem brönda dotaul puschlin dita tlüva,
schlargans itaulezzan, — wär chunnt da no druus?
I wett zwar nüt gseit ha schüschüschüschü
schüschüschüschüschüschüschüschüschüschü
gäuet das düecht öich ou?
Dä isch es gwüss, momou!

Haut, aber eigetlech, wenn i so danke,
’s chönnt o dr Herr Lehme sy, dä obedra,
dasch dä, wo de Ching tuet Maroni verschänke,
är grüesst gäng so fründlech u blybt bi eim sta,
u brichtet echli, aber äbe, är blinzlet
so mit eim Oug, u macht mängisch hmhm,
är zali schyns pünktlech u putzi d’Schue säuber,
mi het ne hie gärn, aber äbe, grad settig —
i wett ja nüt gseit ha schüschüschüschü
schüschüschüschüschüschüschüschüschü
gäuet das düecht öich ou!
Dä isch es gwüss, momou!